

TARIKH : 21 JUN 2023  
AKHBAR : BERITA HARIAN  
MUKA SURAT : 25

## Eksport negara tunjuk sedikit tanda pemulihan

# Eksport negara tunjuk sedikit tanda pemulihan

### Prestasi sejajar dengan permintaan global perlahan

Oleh Alzahrin Alias  
zahrin@bh.com.my

Prestasi eksport Malaysia menunjukkan tanda pemulihan dengan mencatatkan pengurangan marginal sebanyak 0.7 peratus kepada RM119.61 bilion pada Mei 2023 berbanding penurunan dua angka yang direkodkan bulan sebelumnya.

Malaysia mencatatkan lebih dagangan ke-37 bulan berturut-turut dengan pertumbuhan dua angka sebanyak 21.4 peratus kepada RM15.42 bilion.

Bagaimanapun, sejajar dengan permintaan global yang perlahan dan harga komoditi lebih rendah, jumlah perdagangan berkurang dua peratus ke-

pada RM223.8 bilion.

Sementara itu, import pada Mei 2023 susut 3.3 peratus RM104.19 bilion.

Prestasi perdagangan ini seiring negara serantau lain yang turut mencatatkan pertumbuhan perdagangan negatif seperti China, Taiwan dan Korea Selatan.

Kementerian Pelaburan, Perdagangan dan Industri (MITI) dalam satu kenyataan berkata, meskipun mencatatkan penyusutan, eksport ke rakan dagang utama khususnya China, Amerika Syarikat (AS) dan Jepun merekodkan peningkatan.

Sementara itu, ia berkata, kenaikan eksport turut dicatatkan bagi keluaran petroleum, barangan elektrik dan elektronik, jentera, kelengkapan dan peralatan serta barangan makanan diproses.

"Perdagangan, eksport, import dan lebih dagangan masing-masing merekodkan pertumbuhan dua angka 13.2 peratus, 13.7 peratus, 12.6 peratus dan 22.1 peratus berbanding April 2023," katanya.

MITI berkata, dalam tempoh

lima bulan pertama tahun ini, jumlah perdagangan melepasi RM1 trilion yang bernilai RM1.066 trilion, susut 1.7 peratus berbanding tempoh sama tahun lalu.

#### Eksport turun 2.3 peratus

Ia berkata, eksport turun 2.3 peratus kepada RM579.39 bilion dan import berkurang satu peratus kepada RM486.96 bilion.

"Lebih dagangan berkurang 8.7 peratus kepada RM92.43 bilion," katanya.

Pada Mei 2023, eksport barangan perkilangan yang merangkumi 85.4 peratus atau RM102.18 bilion daripada jumlah eksport naik 1.8 peratus berbanding setahun lalu setelah mencatatkan pengurangan bagi dua bulan berturut-turut.

Ini disumbangkan oleh kenaikan eksport keluaran petroleum, barangan elektrik dan elektronik, jentera, kelengkapan dan peralatan, barangan makanan diproses serta barangan optik dan saintifik.

Eksport hasil galian meningkat 5.9 peratus tahun ke tahun kepada RM9.26 bilion disokong oleh eksport kukuh bagi gas asli cecair (LNG).

Sementara itu, eksport keluaran pertanian berjumlah RM7.44 bilion, menguncup 30.9 peratus berbanding Mei 2022 disebabkan, terutama oleh pengurangan nilai eksport bagi minyak sawit dan keluaran pertanian berasaskan minyak sawit.

Perbandingan bulan ke bulan, eksport barangan perkilangan, hasil galian dan keluaran pertanian masing-masing meningkat 12.5 peratus, 43.7 peratus dan 3.2 peratus.

Bagi tempoh Januari hingga Mei 2023, eksport barangan perkilangan menurun 1.5 peratus kepada RM492.15 bilion berbanding tempoh sama lalu berikutan pengurangan permintaan bagi keluaran getah, barangan perkilangan logam, barangan perkilangan berasaskan minyak sawit serta kimia dan bahan kimia.